

清史列傳

第一函
第八冊

清史列傳

卷七

大臣畫一傳檔正編四

董衛國

董衛國漢軍正白旗人初任佐領歷官國史院學士順治十八年擢江西巡撫康熙四年加工部尙書銜九年以病乞休詔慰留之十三年正月改兵部尙書銜時逆藩吳三桂犯湖南長沙失守衛國疏請發兵備禦袁州吉安命副都統根特巴圖魯自兗州移師赴援會逆藩耿精忠復犯寧都廣昌南豐等處廣信副將柯昇叛應之衛國密疏告急命定南將軍希爾根會同衛國相機剿禦衛國復疏言袁州逼賊氛應設總兵統兵三千鎮守並請以副將趙應奎陞授詔從之南瑞總兵楊富謀不軌衛國廉得實擒置之法並殲其黨上嘉其功七月設江西總督卽授衛國舊制南昌水師營兵五百以守備領之衛國奏省會重地應改設遊擊增兵五百又江西營制爲馬一步九用兵之際多一馬兵可當步兵十奏改馬二步八均如所請行十一月耿逆賊黨分犯新昌上高衛國調遊擊佟國棟參將趙登舉

守備張射光往援大捷斬僞都督左宗榜十四年七月與希爾根等招撫泰和龍泉永新廬陵僞官二百七十餘賊衆六萬五千有奇上高新昌金谿餘干諸寇遏廣信糧道十二月衛國奏督兵親剿值簡親王喇布駐師南昌以省城投誠人雜處堪虞督臣不宜他出奏止之十五年正月遣中軍吳友明擊賊於瑞州復上高新昌二縣二月賊圍靜安調吳友明擊之賊潰十二月遣副將許盛遊擊楊以松等先後敗賊於泰和定南復其城十六年三月疏言賊首楊玉泰竊據宜黃樂安崇仁山谷中請統官兵埽蕩允之未幾招降崇仁僞總兵蔡仕伯宜黃僞總兵沈鳳祥等五月大破賊衆於大嶺陣斬僞官百餘兵五千餘復樂安玉泰窮蹙降時湖南平江及銅鼓營賊起衛國留提督趙賴守樂安調本省兵援楚會簡親王檄衛國標下兵盡赴樂安衛國以江西爲楚粵控要省城駐滿兵不過二百恐守禦失利上疏乞賜罷斥嚴旨責王不合並申諭嗣後調遣與衛國會商行之八月遣兵徇建昌招撫僞總兵張發等官一千餘衆六萬餘九月擊走賊首朱統錫於瀘溪擒其黨金洪尹文郁十二月遣兵徇南昌招撫僞總兵袁菊茂等官一千三百餘衆五萬餘復銅鼓營衛國以伏莽未靖疏請赴吉安隨簡親王協力撲剿留副

都統多諾守南昌得旨綠營官兵聽便宜調遣十七年三月賊首韓大任赴閩降其黨郭應輔等分據萬安泰和諸縣衛國剿其衆四萬餘招撫僞總兵以下官三百餘衆四萬六千餘分別安置六月吳逆犯永興薄吉安上命衛國酌撥綠旗兵守吉安速募精銳五千備援先往衛國奉旨守銅鼓營三桂既死餘黨據岳州長沙大兵圍之不下十二月衛國奏銅鼓營寧謐無事請赴楚援剿上嘉許並授方略未幾岳州長沙繼定十八年正月詔赴大將軍安親王岳樂軍協同進取於是衛國隨大將軍由衡州寶慶大敗賊於紫陽河雙井鋪復武岡城嗣給事中李宗孔劾衛國居總督任不治事失民心廷議革職諭戴罪圖功十九年三月率兵破鴨婆黃茅等嶺進剿靖州賊與都統穆占會追敗僞將軍吳應麟等復沅州十月至鎮遠奪石港口抵大巖門僞將軍張足法悉衆拒衛國親奮擊大破之足法夜遁追至油聞關而還復鎮遠城大兵既定貴州大將軍貝子彰泰進征雲南留衛國守貴陽二十年雲南平回任二十一年調湖廣總督二十二年廷議前綏遠將軍湖廣總督蔡毓榮劾衛國不聽調度貽誤軍機而衛國有平鎮遠功請免議諭曰董衛國遵朕指授剿定賊寇恢復鎮遠實爲可嘉蔡毓榮勞績遠出其下且二

人敵體大臣無聽調度例以妒功故陷人重罰著將蔡毓榮降五級調用先是御史蔣伊劾衛國縱兵俘掠至是江西總督于成龍疏辯十一月衛國入覲瀕行諭曰爾在外二十餘年地方事宜知之已悉前此用兵之際未免騷擾閭閻今天下承平當思休養民力至於興革利弊尤在嚴飭所屬實力奉行爾前有勞績朕罔不知毋畏人言勉圖後效十二月衛國遘疾卒於任賜祭葬如例

瑚圖

瑚圖滿洲鑲白旗人姓洪鄂氏順治十二年以護軍校隨寧南靖寇大將軍陳泰出師湖廣敗明桂王將盧明臣馮雙禮於岳州武昌十七年隨安南將軍洛託赴福建敗海賊鄭成功於廈門康熙二年授駐防江寧協領八年擢江寧副都統十三年逆藩耿精忠叛上命瑚圖同副都統瑪哈達率所部赴杭州與將軍圖喇計兵事尋以賴塔爲平南將軍瑚圖參其軍務八月僞將軍馬九玉遣其將胡錦等犯衢州至石梁瑚圖與副將王廷梅李承恩分路迎擊賊潰奔崖山進圍之擒錦時賊黨小林別駐大溝源乘勝進擊大敗之十月僞將馬四等率賊衆一由江山至錢塘一由處州至林山謀犯衢州瑚圖分兵東西夾攻陣斬僞將范安國王大

頂等已而僞將周列桑明率衆三萬屯焦園紅橋等處分路擊之連破賊衆斬萬餘級十四年三月九玉擁衆屯衢州西南夜渡水犯我營賴塔令瑚圖廷梅往擊之敗諸杭埠斬殺甚衆餘賊多溺死八月九玉遣其將李廷桂率賊七千營於衢州北元口村設木城絕官軍糧道並據東西山爲聲援瑚圖分兵擊敗兩山賊夜衝賊營焚其木城賊敗遁十五年八月官軍破賊於大溪灘復江山縣九玉走常山瑚圖追之賊拒戰又敗之進圍常山賊夜開西門遁追至江西玉山界賊大潰斬獲無算復常山縣進克仙霞界拔浦城精忠窮蹙詣康親王傑書軍門降瑚圖隨軍駐福州十一月海逆鄭錦將徐耀率衆三萬至烏龍江南營於小門直鳳諸山謀犯福州康親王傑書遣瑚圖同總兵董大來夾擊破賊營十四賊遁追四十餘里尋以瑚圖防守泉州十六年三月泉州城內外土賊四起瑚圖遣將領水陸分剿盡殪之十月南安縣賊陳式陳角等樹旗揚言欲犯泉州瑚圖令營長張廷輔副將朱起龍分擊敗之斬陳角先是漳泉多寇南安賊首李復貴同安賊首朱寅各據高山勾海逆乘機剽掠康親王傑書令提督段應舉同瑚圖分路進剿擒復貴及寅之僞軍師林日向等至是寅復犯陽坑小黃山瑚圖與三等台吉查渾

副都統卹爾根追擊之三戰皆捷殺賊千餘斬僞將謝良楊德瑚圖尋駐漳州十七年二月海逆陷石瑪逼海澄瑚圖同海澄公黃芳世副都統孟安應援敗賊於彎腰樹奪金門山進至觀音山賊陳福陳仁來拒擊敗之賊奔下滸追之斬僞將洪結賊收餘黨於石瑪築壘拒官軍三月賊船二百餘乘潮至壘中賊復出列相表裏瑚圖與芳世安營令海澄總兵官黃藍潛師夾攻陣斬僞將朱成高榮等十一人沈賊船九賊仍遁入壘海澄圍解時官兵俱屯海澄石瑪漳州兵少瑚圖同總督卽廷相晝夜防守忽海逆連艘數百乘虛突犯入東關擊以礮賊敗退復益船擁衆至且勾山賊蔡寅由天寶山斷我糧道瑚圖親督戰焚其船賊仍不退閏三月芳世自海澄以兵來援大破賊衆寅始遁去時海逆劉國軒吳淑等復破海澄陷長泰糧道復阻賴塔令瑚圖帶甲八百防守要路九月淑率賊萬餘逼漳城國軒營對河爲犄角城內兵少適副都統沃申率兵千餘來援瑚圖隨賴塔分路剿至蔗林遇伏我兵小卻斬退者三人我兵奮進遂破賊陣連拔其營十六殺賊過半賊退據長泰謀犯南靖我兵分二隊進城列營蜈蚣山瑚圖沃申力戰自辰至未賊大敗棄營走斬賊將鄭英何觀及賊衆四千餘復長泰城賊退據江東橋

橋爲漳泉往來要道十月賴塔營橋西令瑚圖同沃申提督石調聲取橋東岸乃由長泰繞道越朝天嶺過龍江口深入賊巢賊以礮迎敵瑚圖等奮勇衝擊賊棄寨奔船據橋口急擊之賊奔出江遂通漳泉路十八年二月賊設伏四山來誘我戰瑚圖同副都統雅達里分兵突至山下伏盡起瑚圖等力戰不退賊大敗奔據玉洲觀音山各寨十月賊屯鼇頭山窺江東橋欲斷我路我兵四路迎剿瑚圖與副都統瑪思文爲一路擊敗之十九年三月我兵分路剿賊瑚圖攻克玉洲各寨賊戰敗竄廈門遂復海澄四月賊江欽等糾黨連艘竄踞廣東達濠島瑚圖隨賴塔至潮州沿海督剿水陸並進賊退乘勝取磊石門賊來爭復擊敗之又遇我水師夾攻賊大潰遁出外大洋尋聞粵平定瑚圖回江寧任二十三年十一月上南巡駐蹕江寧賜瑚圖蟒袍一十二月擢杭州將軍二十六年三月卒於官得旨瑚圖才品優長殫心盡職效力行間勞績茂著及授杭州將軍復能和輯兵民不干預地方事務行止清慎克盡厥職著從優議卹尋議祭葬如例特旨加祭一次諡敏恪

蔡毓榮

蔡毓榮漢軍正白旗人漕運總督蔡士英次子也初任佐領兼刑部郎中尋授京畿道御史兼參領遷秘書院學士聖祖仁皇帝康熙五年授刑部侍郎七年遷吏部侍郎九年授四川湖廣總督駐荊州十年疏言蜀省民少田荒宜廣招開墾凡候選及現任人員招民三百戶者議敘卽用卽陞墾熟田畝寬限五年起科又言蜀省衝要營員請照沿邊例題補十一年疏言移駐弁兵其子弟有讀書者應准入籍考試十二年請裁遵義總兵官改鎮松潘事並下部議行是年十二月逆藩吳三桂反毓榮疏言雲貴總督甘文焜手書遺臣言吳三桂反臣隨調沅州總兵官崔世祿疾赴貴州禦之令彝陵總兵徐治都永州總兵李芝蘭各率兵繼進上諭以宜令提督桑額疾馳沅州固守敕遣王貝勒大臣領八旗兵至荊州復命侍衛納爾泰傳諭毓榮籌備軍需十三年二月分設四川總督改毓榮專督湖廣以前招民墾荒敘功加兵部尙書銜先是賊兵陷沅州崔世祿降賊至是常德澧州長沙岳州相繼失守部議毓榮當賊未陷常德時不卽令桑額往調度無能應革職命從寬留任戴罪圖功尋丁父憂命在任守制仍率綠旗兵偕八旗兵進剿毓榮遣中軍副將胡士英等分防江口值叛鎮楊來嘉等踞南漳縣之天門寨馬良

坪諸處出掠城邑毓榮遣襄陽總兵劉成龍率兵禦剿屢奏捷時廣西提督馬雄叛應吳三桂以逆書與兩廣總督金光祖詭言毓榮欲攜綠營兵數千赴岳州降賊金光祖爲毓榮姻戚密遣人告之蔡毓榮疏陳狡謀誣陷請解任回旗上命以殫心供職勿因逆書引嫌十四年九月大將軍順承郡王勒爾錦奏增設綠旗兵援剿二營領以兩副將詔毓榮統轄之毓榮尋疏言吳逆久據湖南而湖南之長沙與江西之吉安袁州接壤郴州桂陽又與吉安之龍泉接壤若楚省大兵由荆岳諸路進而江省大兵亦由袁州諸路會期進攻使賊三面受敵首尾不能相顧則我兵之勢合而賊兵之勢分一舉而膚功立奏也又言前此屢奉恩諭陷賊官民來歸悉赦已往之罪且不惜數百萬之帑金用兵剿賊無非爲救民水火計惟是烽燧之區或不暇辨是民是賊恐俘戮者衆乞敕統兵王貝勒遴選滿洲賢員齎奉撫民敕諭隨師前進每收復城邑卽稽察戶口悉予安輯賊黨以外戒無妄殺則脅從之衆無不聞風投順矣疏並下所司議行十七年毓榮奉詔率兵五千隨貝勒尙善剿賊岳州因同討逆將軍鄂納等率舟師進剿柳林嘴及君山用礮擊沈賊舟殲賊無算賊復犯我糧艘夾擊敗之斬級千餘是年吳三桂死大兵以

次恢復岳州長沙衡州等府十八年三月毓榮疏言洞庭湖中之君山有龍神廟久著靈顯唐封爲利涉侯宋加封順濟王我朝順治四年王師過湖祈風有應委官葺新昨歲七月大軍攻取湘陰風浪疊壞船艦臣同討逆將軍鄂訥登山虔禱卽風靖浪平克復岳城湖南諸郡底定固皆皇上威福所致亦賴湖神護助請敕賜封祀以旌神功疏下部議視嶽鎮海瀆等封爲洞庭湖之神遣禮部祭告十月毓榮疏言湖南惟辰州一府尙爲賊踞而楓木嶺神龍岡兩路皆極險隘我軍士馬疲困宜暫休息俟糧草克繼會期進剿上命給事中摩囉郎中伊爾格圖傳諭曰逆賊敗遁負險未可專俟馬兵宜用綠旗步兵前進聞蔡毓榮所屬官兵甚爲強壯以此兵力何難剿除將滅之寇從古險隘地方若不攻取豈有自定之理其如何恢復辰沅速定雲貴詳議以聞毓榮疏言辰沅水路直達武陵賊既扼險於陸又復據泊上游若我師由陸路進攻恐賊以輕舟順流反襲我後宜造八槳小船二百水陸並進並請專責一人總統諸路綠旗兵上允其議卽授毓榮爲綏遠將軍賜敕總統綠旗兵總督董衛國提督趙賴等並受節制十九年三月分路破賊楓木嶺辰龍關並擊壞賊船復辰州沅州及瀘溪溱浦麻陽等縣八月毓榮請

頒敕招撫吳世璠上諭大學士等曰吳世璠爲賊渠魁恃其險阻抗拒官兵殘害生民罪惡重大蔡毓榮不圖早滅逆寇乃欲降敕招撫率意妄奏著嚴飭之閏八月定邊大將軍貝子彰泰與毓榮由沅州進征貴州奏言綠旗兵與滿洲兵已會合一處若各自調遣恐未能併力奏功上命毓榮一切軍機關白大將軍商酌以行十月毓榮同董衛國督兵復鎮遠府隨彰泰定貴陽二十年正月彰泰奏賊衆萬餘欲據盤江已遣兵固守鐵索橋以禦之上諭之曰大兵秣馬貴陽已經月餘今逆賊欲據盤江祇遣兵前往殊味機宜彰泰蔡毓榮當卽親統大兵撲滅賊衆平定滇中勿失機會三月毓榮隨彰泰抵雲南省城營於歸化寺僞將軍胡國柄等糾衆萬餘列象陣拒戰我師分隊進擊大敗賊衆陣斬國柄及賊衆無算是月逆孽吳世璠自殺其黨以城降雲南平毓榮還任湖廣總督復原職二十一年六月調雲貴總督疏言雲貴兩省險要邊疆又當新復之初督標兵舊設四千未足資彈壓請增兵一千分爲五營又因議裁吳逆所設十鎮請改爲六鎮在迤西者曰鶴麗曰永順曰楚姚蒙景在迤東者曰開化曰臨元澂江曰曲尋武霑又言中甸在金沙江外舊轄麗江土府爲吳逆割畀蒙番通商互市今互市已停而蒙番

所設喇嘛營官未撤宜令土知府木堯仍歸其地十月又奏籌滇善後事宜分別
十疏一曰蠲荒賦逆賊踞滇八載按畝加糧驅之鋒鏑地曠丁稀今各府州衛所
報無徵地丁額賦應亟予蠲除招徠開墾二曰制土夷前此土目世職不過宣慰
吳逆濫加僞職或至將軍總兵投誠之時權照僞銜給劄今當悉行追繳換給土
職其應襲者年十三以上令赴儒學習禮起送承襲族人子弟准就試州縣舊被
吳逆奪職者察明宗派予襲以示綏柔三曰靖逋逃有逆屬舊人鳥駭鼠竄者有
徵兵奉裁乘間兔脫者有八旗僕從不隨師凱旋潛匿滇境者宜定首報賞格重
懲窩隱所獲之人按律量從末減自必聞風投歸不致以畏死之故竄入生番矣
四曰理財源滇省賦稅無多兵食仰給他省惟產五金可令民自開礦硎而官總
其稅省會及祿豐蒙自大理增設鑪座以廣鼓鑄故明沐氏莊田及入官叛產均
令變價以裕鑄本其田仍一例納賦又兵弁皆有餘丁宜令酌墾各營荒地起科
後編入里甲賦有餘而餉可節實爲邊備至計五曰酌安插逆屬家人曾隨賊伍
者應遣發極邊若僅受僞銜並未從行助逆宜免其遷徙以示矜全六曰收軍仗
私造軍器者應坐謀叛論罪其土司收藏刀槍及民人以鉛硝硫黃貿易者並當

嚴禁七曰勸捐輸滇省民鮮蓋藏偶有祲災無從告糴請暫開捐監事例以備積貯八曰弭野盜魯魁在萬山中初爲新嶧阿蒙土人所據嘯聚爲盜內通新平開化元江易門外接車里孟艮鎮元猛緬向者吳逆養寇自重授以僞職今雖震讐天威受土司銜仍宜厚集土練各兵坐鎮隘口以防後患九曰敦實政兵燹之後宜整理撫綏其要在墾荒蕪廣樹蓄裕積貯興教化嚴保甲通商賈崇節儉蠲雜派恤無告止濫差所在州縣卽以十事考殿最立勸懲庶邊疆日有起色十曰舉廢墜學宮之設以育人材吳逆煽亂悉皆頽壞今武功旣成宜倡文教有倡率捐修者錄敘以勵之其逆黨所踞官寮廨宇宜仍給爲公署聽其自葺至通省稅糧旣有成額宜均本色折色之數酌存留起運之經黔滇驛站一例酌增工食則民間永無派累矣疏入上以所奏各款有合時務下九卿詹事科道議行尋諭曰土司等賴刀槍捕獵以爲生計勿概禁止先是毓榮自貴州進征雲南時疏劾提督趙賴駐守貴州抗違檄調進征官兵議政王大臣等以趙賴已奏明防守緊要難於遣發寢議毓榮復劾總督董衛國不聽調度違誤軍機上命事平時再議二十二年部議董衛國未曾違誤且有復鎮遠功請免議上以毓榮妒功誣奏下部議

清史列傳
削五級二十五年閏四月改總督倉場侍郎十月改兵部侍郎十二月領侍衛內大臣佟國維等奏侍衛納爾泰自首前次奉使雲南回京後毓榮令其子琳餽以銀九百兩又內務府新自雲南歸旗之革職知州文定國以毓榮隱匿應官婦女及徇縱逆黨狀入奏詔法司勘鞫得實擬斬立決籍沒命免死與其子琳並遣發黑龍江後赦還三十八年卒

鄂善

鄂善滿洲鑲黃旗人姓納喇氏順治十五年任三等侍衛聖祖仁皇帝康熙三年遷二等侍衛七年九月授祕書院學士八年九月遷副都御史九年閏二月疏言近例官員罰俸事在陞任前者罰已陞之俸事在降調前者罰未降之俸追銀均此處分而先後輕重互異請敕議畫一俾永遠遵循疏下吏部議仍復世祖章皇帝舊制無論陞降並罰現任俸其裁缺給假丁憂者俟補官扣抵免行追四月授陝西巡撫十一年四月擢山西陝西總督尋以山西歸巡撫統轄改鄂善爲陝西總督十二年九月改舊駐貴陽之雲貴總督專轄貴州增設雲南總督調鄂善任之十二月至湖廣值逆藩吳三桂反雲貴已陷賊詔鄂善暫留湖廣與總督蔡毓

榮共籌剿禦十三年正月上聞賊逼沅州鄂善與蔡毓榮及提督桑額皆在荊州諭趣桑額赴援改鄂善雲貴總督隨大軍進征二月桑額率兵渡江賊已至沅州進陷常德澧州桑額仍退守荊州尋部議蔡毓榮失守所屬城邑應革職鄂善不能遵旨籌畫機宜應降五級調用均得旨從寬留任戴罪圖功四月鄂善疏言標下需兵惟自陝攜至健丁一百五十名堪以入伍現在召募罕應請於附近湖廣各省抽調步兵一千四百名陝西省抽調馬兵四百五十名合成標兵二千長驅進剿並請以陝西安遠營參將張夢椒爲臣標中軍副將陝西提標守備李國樑爲臣標左營遊擊陝西督標千總馬德昌爲臣標中營守備俾收得人之效疏下部議附近湖廣各省步兵俱當防守汛地陝西馬兵本省需用皆未便抽調仍令鄂善在湖北酌募其標下中軍副將等官已由部選授張夢椒等應留陝西原任六月鄂善復疏言欲募有隣里保結之兵漫無一應由楚人止就本省之募不就滇黔之募也其自願投充者慮係逃人或爲奸宄無益有害萬不敢招轉盼入秋大軍進剿湖南招徠降兵即可撥補營伍請敕領兵王將軍等於恢復之日陸續驗發充額疏下部議從之十二月陝西提督王輔臣叛於寧羌州秦州平涼俱陷

清史稿卷一百一十五 列傳五十五
詔鄂善同副都統穆舒渾等率現駐襄陽之滿洲蒙古兵移守興安漢中十四年正月鄂善至安西總督哈占以省會兵少奏留鄂善與穆舒渾率所攜之兵協守尋詔移守榆林延安哈占兩奏止之六月遣營總鄂爾博什邁圖等援邵陽擊敗叛將李師膺於鳳凰山獲偽箭旗礮八月上諭責哈占曰前以延安爲諸路要區曾命鄂善駐守哈占奏留之西安致延安陷沒迨將軍畢力克圖恢復延安又命鄂善前往安撫殘黎保固疆土乃至今未行皆由哈占但知有西安置他處於度外也是月鄂善移駐延安尋奏招還復業人民六萬二千餘得旨嘉獎十六年六月率兵分守棧道以東鄆縣各山口七月賊由洪河口至塘坊廟列衆二千來犯鄂善令右翼兵擊賊山澗左翼兵擊賊河岸而自領中營兵踴躍直前仰攻山梁斬馘百餘賊自相踐踏越山而遁是月授甘肅巡撫十七年七月以失察布政使伊圖侵蝕採買價值部議革職詔從寬留任先是正月清水縣民捏告知縣修國佐苛歛各款鄂善令按察使舒淑布勘鞫舒淑布檄秦州知州王之鯨就近質訊延擱數月至是清水縣民赴京叩闕上遣吏部郎中丹岱等往鞫昌察審得實十八年正月還奏修國佐革職計賊論絞舒淑布王之鯨懸案逾限擬降調鄂善於